



東國通鑑

卷一百一十一

U 6
4060
1



四存
4050
卷1-31

東國通鑑序

樂善齋

對馬文庫

經以載道史以記事經則孔子刪定述
作已垂教於萬世史則馬班以下作者
非一代各有書浩穰難記學者雖窮十
年之力尚不讀遍况人主日有萬幾復
何暇於周覽哉先正司馬公哀集歷代
史旁採羣書撮其機要上起襄周下迄
五季作長編曰資治通鑑誠史家之指
南也紫陽朱夫子因之作綱目文約而
事愈備監戒昭而義微著深得春秋謹

嚴之旨後有作者舉不外於二家範圍之中矣吾東方自檀君歷箕子以至三韓載籍無微下逮三國僅有國乘粗略太甚加以無稽不經之說後之作者相繼纂述有全史焉有史略焉有節要焉然復襲本史之疎漏高麗氏統三為一傳世三十三歷年幾五百雖有國史中間記載繁簡頗有不同且未免闕遺之失恭惟

太祖康獻大王應運開國收舊圖籍以為秘

府之藏

三宗相承文治益隆設官開局撰農史有所謂全史者有所謂節要者史家制作於斯漸備

世祖惠莊大王聖學天縱留神經史嘗謂左右曰吾東方雖有諸史無長編通鑑可擬資治

命詞臣將欲校讎而事竟未施我

主上殿下紹膺大統適追先猷命達城君

徐居正行護軍臣鄭孝恒參議臣孫比

長行護軍臣李淑城前都事臣金澤校
理臣李承寧司儀臣表沿洙典籍臣崔
溥博士臣柳仁洪暨臣克墩等撰修東
國通鑑以進臣等俱以庸拙才乏三長
恭承

綸命凌兢罔措謹撫三國以下諸史蕪採
中國史用編年記事凡例一依資治而
寓以綱目筆削之旨刪繁削冗務存要
領三國並峙則稱三國紀新羅統合則
稱新羅紀高麗則稱高麗紀三韓以上

則稱外紀上下千四百年國勢之離合
運祚之脩短君舉之得失政治之污隆
靡不直書至如重名教崇節義討亂賊
誅奸諛尤加謹嚴庶幾垂勸戒而訓後
世也先儒之有論斷者皆取兩書之間
亦竊附臣等之臆論極知狂僭不足齒
作者之列臣又竊念箕子以九疇之學
敷八條之教當時必有記動記言之官
備載嘉言善行而今皆泯滅無傳三國
則鄙野荒繚高麗則脫略舛錯雖使借

手於班馬尚難為之詞况如臣等之設
聞陋識安能仰體

隆委而贊一辭乎姑以管見彙粹纂次編
成五十七卷粧潢投

進倘於

宵旰之暇時

賜觀覽鑑前世治亂興亡之跡為今日左
右之箴警益懋稽古之

盛德則其於至治未必無小補云成化乙
巳七月二十六日純誠佐理功臣嘉善

大夫廣原君兼同知義禁府事世子右
副賓客臣李克墩拜手稽首謹序

東國通鑑凡例

一三國以前史書漫滅無傳雜採諸書作
外紀

一三國勢均力敵不可主一故依綱目無
正統例以立國先後分註其年稱其紀
曰三國紀新羅統一之後始大書其年
稱某國紀每王依資治通鑑例先書某
王

一新羅之初其君有稱居西干者尼師今
者麻立干者皆王號也崔致遠年代曆

惡其鄙野悉皆稱王今從之

一凡君或名或號或謚妃或稱后世子或稱太子或稱正胤教或稱詔或稱制官爵之倖擬上國皆從實直書

一每年必先書中國年號尊之也新羅嘗行年號僭擬中國故削之

一綱目法春秋筆削之旨寓褒貶以示勸戒陳桎因之作續編綱目至如少微之通鑑節要張光啓之續編節要凡有關於名教國家大體者則略做綱目之例

先提其綱後叙其實今從之

一三國皆憂年改元權近史略踰年稱元者惡其非禮也然記事頗有牴牾今據實書之

一善德真德真聖陰居尊位非常之變不可以訓後世故黜而稱主

一忠烈忠宣忠肅忠惠父子前後為王忠宣立則稱忠烈為上王忠烈復位則稱忠宣為前王以明父子之義忠肅忠惠倣此

一辛禡依王莽例止書甲子書其年於註
昌立未久附恭讓元年
一災異之驗於事者必書餘皆略之祥瑞
不書而因事乃書
一百濟高句麗之郊祀天地高麗之八關
會遊幸寺院受菩薩戒設道場飯僧時
君常事或書其始或書其尤甚者或以
事而書之外國之來投納款者不可勝
書或書其始至或因事書之

東國通鑑凡例終

東國通鑑外紀

檀君朝鮮

東方初無君長有神人降于檀木下國人立
為君是為檀君國號朝鮮是唐堯戊辰歲也
初都平壤後徙都白岳至商武丁八年乙未
入阿斯達山為神

臣等按古紀云檀君與堯並立於戊辰歷
虞夏至商武丁八年乙未入阿斯達山為
神享壽千四十八年此說可疑今按堯之
立在上元甲子甲辰之歲而檀君之立在

後二十五年戊辰則曰與堯並立者非也
自唐虞至于夏商世漸澆漓人君享國久
長者不過五六十年安有檀君獨壽千四
十八年以享一國乎知其說之誣也前輩
以謂其曰千四十八年者乃檀氏傳世歷
年之數非檀君之壽也此說有理近世權
近入覲天庭

太祖高皇帝命近賦詩以檀君為題近詩曰
傳世不知幾歷年曾過千

帝覽而可之時論亦以近之言為是姑存之

以備後考

箕子朝鮮

殷太師箕子紂諸父也紂無道比干諫而死
微子去之箕子即被髮佯狂為奴嘗曰商其
淪喪我罔為臣僕及周武王伐紂訪道于箕
子箕子為陳洪範九疇武王封于朝鮮都平
壤教其民以禮義田蠶織作為民設禁八條
相殺以當時償殺相傷以穀償相盜者男沒
入為其家奴女為婢欲自贖者人五十萬雖
免為民俗猶羞之嫁娶無所售是以其民終

不相盜無門戶之閉婦人貞信不淫辟其田野都邑飲食以籩豆有仁賢之化其後孫朝鮮侯見周衰而燕稱王將東略地亦自稱王欲與兵伐燕以尊周大夫禮諫之而止使禮西說燕燕亦止不攻後子孫稍驕虐燕乃遣將攻其西取地二千餘里至滿潘汗為界朝鮮遂弱及秦并天下築長城抵遼東四十年代孫否立畏秦遂服屬於秦否死其子準立二十餘年而陳項起天下亂燕齊趙民愁苦稍稍亡歸準及盧綰為燕王準與燕以涇水為

界及綰又入匈奴燕人衛滿亡命聚黨千餘人黠結蠻夷服而東渡涇水東居西界為藩屏準信之拜為博士賜以圭封之百里令守西鄙滿誘亡黨稍衆乃遣人詐告準漢兵十道至欲入宿衛遂襲準準戰不敵浮海南奔

臣等按范曄曰箕子違表殷之運避地朝鮮施八條之約使人知禁邑無淫盜門不夜扃柔謹為風道義存焉省簡教條而用信義其得聖賢作法之原矣涵虛子亦曰箕子率中國五千人入朝鮮其詩書禮樂

醫巫陰陽卜筮之流百工技藝皆從而往
焉既至朝鮮言語不通譯而知之教以詩
書使其知中國禮樂之制父子君親之道
五常之禮教以八條崇信義篤儒術釀成
中國之風教以勿尚兵鬪以德服強暴隣
國皆慕其義而相親之衣冠制度悉同乎
中國故曰詩書禮樂之邦仁義之國也而
箕子始之豈不信哉

衛滿朝鮮

衛滿既逐箕準據王儉城會孝惠高后時天

下初定遼東太守約滿為外臣保塞外諸國
無使寇邊諸國欲入朝勿禁以故滿得以兵
威財物侵降其旁小邑真蕃臨屯皆來服屬
方數千里傳子至孫右渠所誘漢亡人滋多
又未嘗入覲辰國欲入朝天子又壅閉不通
武帝使涉何譙諭右渠終不肯奉詔襲殺何
元封三年帝遣樓舡將軍楊僕從齊浮渤海
左將軍荀彘出遼東討之右渠發兵拒之兩
將圍城戰不利朝鮮大臣陰使人約降樓舡
以間之左將軍急擊樓舡欲就約不戰左將

軍意樓舡及以故不相能帝以兵久不快遣
濟南太守公孫遂往征之得以便宜從事遂
至左將軍告遂執樓舡并其軍急擊之朝鮮
相路人相韓陰尼谿相參將軍王啖相與謀
殺右渠降漢遂定朝鮮為四郡封參為瀋清
侯陰為荻苴侯啖為平州侯路人之子最為
涇陽侯

四郡

漢武帝元封三年討右渠遂定朝鮮故地為
樂浪臨屯玄菟真蕃四郡樂浪郡治朝鮮縣

蓋以右渠所都為治所也臨屯郡治東曉縣
玄菟郡治沃沮城後為夷貊所侵徙郡勾麗
西北真蕃郡治靑縣郡初取吏於遼東吏見
民無閑歲及賈人往者夜則為盜俗稍益薄
犯禁浸多至六十餘條仁賢之化變矣

二府

漢昭帝始元五年以朝鮮舊地平那玄菟等
郡為平州都督府臨屯樂浪等郡為東府都
督府

三韓

馬韓

箕準既為衛滿所攻奪率其左右官人走入海居韓地金馬郡自號韓王其民土著種植知蠶桑作綿布各有長帥大者自名為臣智其次為邑借散在山海間無城郭有喪襄國牟水國桑外國小石索國大石索國優休牟涿國臣漬沽國伯濟國速盧不斯國日華國古誕者國古離國怒藍國月支國答離牟盧國素謂乾國古爰國莫盧國卑離國占離卑國臣爰國支侵國狗盧國卑彌國監奚卑離

國古蒲國致利鞠國毋路國兒林國駟盧國內卑離國感奚國萬盧國辟卑離國舊斯烏旦國一離國不離國友半國狗素國捷盧國牟盧卑離國臣蘇塗國古臘國臨素半國臣雲新國如來卑離國楚山塗卑離國一難國狗奚國不雲國不斯漬邪國爰池國乾馬國楚離國凡五十餘國大國萬餘家小國數千家摠十餘萬戶俗少綱紀居處作草屋土宇其戶向上俗不重金銀錦罽而貴瓔珠用以飾髮垂耳其男子衣帛袍履草躋性勇悍謹

呼力作善用弓楯矛楯

辰韓

弁韓

辰韓在馬韓之東自言秦之亡人避後入韓韓割東界以與之立城柵言語有類秦人或謂之秦韓常用馬韓人作主雖世世相承而不得自立明其流移之人常制於馬韓地宜五穀俗饒蠶桑善作縑布乘駕牛馬嫁娶禮俗男女有別行者相逢皆住讓路又有弁韓不知其始祖屬於辰韓辰弁二國各統十二國又有諸小別邑各有渠帥大者名臣智其

次有險側次有樊澁次有殺奚次有邑借有已抵國不斯國弁辰彌離彌凍國弁辰接塗國勤耆國難彌離彌凍國弁辰古資彌凍國弁辰古淳是國弁奚國弁辰半路國弁樂奴國軍彌國弁軍彌國弁辰彌烏邪馬國如湛國弁辰甘路國戶路國州鮮國馬延國弁辰狗邪國弁辰走漕馬國弁辰安邪國弁辰瀆盧國斯盧國優中國合二十四國大國四五千家小國六七百家總四五萬戶

權近曰三韓之說互有不同然朝鮮玉準

避衛滿之亂浮海而南開國彌馬韓至百濟溫祚立遂并之今之益州有古城至今人稱為箕準城則馬韓之為百濟無疑矣辰韓新羅始祖赫居世所起之地新唐書曰卞韓在樂浪之地又曰平壤古漢之樂浪郡則辰韓之為新羅卞韓之為高句麗亦無可疑後漢書以為卞韓在南辰韓在東馬韓在西其謂卞韓在南者蓋自漢界遼東之地而云耳非謂卞韓在辰馬二韓之南也崔致遠因謂馬韓麗也卞韓百濟

也誤矣

臣等按三韓所統七十餘國之名見於陳壽三國志者如此必非鑿空造語而東史不傳今不得考其所在

東國通鑑目錄

卷第一

新羅

始祖王居世

南解王

儒理王

高句麗

始祖東明王

瑠璃王

大武神王

百濟

始祖溫祚王

多婁王

卷第二

新羅

儒理王

脫解王

婆娑王

祗摩王

逸聖王

阿達羅王

高句麗

大武神王

閔中王

慕本王

太祖王

次大王

新大王

百濟

卷第三

新羅

多婁王

已婁王

盖婁王

肖古王

伐休王

柰解王

助賁王

沾解王

味鄒王

儒禮王

基臨王

訖解王

高句麗

故國川王

山上王

東川王

中川王

西川王

峰上王

羨川王

故國原王

百濟

肖古王

仇首王

沙伴王

古爾王

責稽王

分西王

比流王

卷第四

新羅

訖解王

柰勿王

實聖王

訥祗王

慈悲王

照智王

高句麗

故國原王

小獸林王

故國壤王

廣開土王

長壽王

百濟

契王

近肖古王

近仇首王

枕流王

辰斯王

阿莘王

腆支王

以爾莘王

毗有王

盖鹵王

文周王

三斤王

東城王

卷第五

新羅

炤知王

智證王

法興王

真興王

真智王

真平王

高句麗

文咨王

安藏王

安原王

陽原王

平原王

嬰陽王

百濟

東城王

武寧王

聖王

威德王

惠王

法王

武王

卷第六

新羅

真平王

善德女王

高句麗

嬰陽王

榮留王

寶藏王

百濟

武王

義慈王

卷第七

新羅

善德女王

真德女王

太宗王

高句麗

寶藏王

百濟

義慈王

卷第八

新羅

太宗王

文武王

高句麗

寶藏王

卷第九

新羅

文武王

神文王

卷第十

新羅

孝昭王

聖德王

孝成王

景德王

惠恭王

宣德王

元聖王

昭聖王

哀莊王

憲德王

卷第十一

新羅

興德王

僖康王

神武王

文聖王

憲安王

景文王

憲康王

定康王

真聖女王

孝恭王

附甄萱

弓裔

神德王

卷第十二

新羅

景明王

景哀王

敬順王

附甄萱

卷第十三

高麗

太祖

惠宗

定宗

光宗

景宗

卷第十四

高麗

成宗

卷第十五

高麗

穆宗

顯宗

卷第十六

高麗

顯宗

德宗

靖宗

卷第十七

高麗

文宗

順宗

卷第十八

高麗

宣宗

獻宗

肅宗

卷第十九

高麗

肅宗

睿宗

卷第二十

高麗

睿宗

卷第二十一

高麗

仁宗

卷第二十二

高麗

仁宗

卷第二十三

高麗

仁宗

卷第二十四

高麗

毅宗

卷第二十五

高麗

毅宗

卷第二十六

高麗

明宗

卷第二十七

高麗

明宗

卷第二十八

高麗

明宗

卷第二十九

高麗

神宗

熙宗

康宗

卷第三十

高麗

高宗

卷第三十一

高麗

高宗

卷第三十二

高麗

高宗

卷第三十三

高麗

高宗

卷第三十四

高麗

元宗

卷第三十五

高麗

元宗

卷第三十六

高麗

元宗

卷第三十七

高麗

忠烈王

卷第三十八

高麗

忠烈王

卷第三十九

高麗

忠烈王

卷第四十

高麗

忠烈王

附忠宣王

卷第四十一

高麗

忠烈王

卷第四十二

高麗

忠宣王

忠肅王

卷第四十三

高麗

忠肅王

卷第四十四

高麗

忠惠王

忠肅王復位

忠惠王復位

卷第四十五

高麗

忠惠王

忠穆王

忠定王

卷第四十六

高麗

恭愍王

卷第四十七

高麗

恭愍王

卷第四十八

高麗

恭愍王

卷第四十九

高麗

恭愍王

卷第五十

幸禍

卷第五十一

幸禍

卷第五十二

幸禍

卷第五十三

幸禍

卷第五十四

高麗

恭讓王

卷第五十五

高麗

恭讓王

卷第五十六

高麗

恭讓王

東國通鑑目錄終

進東國通鑑箋

純誠明亮佐理功臣崇政大夫達城君

兼弘文館大提學藝文館大提學知

經筵春秋館成均館事臣徐居正等謹

將新修東國通鑑繕寫粧潢投

進臣居正等誠惶誠恐頓首頓首

上言竊以

與治興與亂亡興亡可鑑於既往不虛

美不隱惡美惡當示於將來歷觀修史

之規咸以編年為本通鑑托始於涑水

祛馬史紀傳之冗長綱目裁揮於晦菴
得麟經衮鉞之奧妙少微因之作節要
劉刻述而著續編雖紀載詳略之殊其
體裁義例則一念我朝鮮有國古稱文
獻之邦擅君並立於唐堯民自淳而俗
自朴箕子受封於周武過者化而存者
神然古籍之無徵豈空言之可載迨四
郡瓜分之後及二府幅裂之餘諸韓蜂
起而寢衰三國鼎峙而割據新羅肇基
東土三易姓而歷年最長麗濟皆出朔

方兩立國而境壤相接然各誇強而詫
大曾不息兵而善隣時干戈之相尋日
疆場之自感考隆替有遞速之異論得
失無彼此之分第國乘之僅存而文理
之或蓋事涉不經而荒恠語多無稽以
繆悠雖再經先儒之校讎猶復襲本史
之踈漏泰封自絕麗祖乃興經營四方
剋羣雄而耆定削平二國合三韓以為
家式恢宏遠之模永建創垂之業三十
代籙既傳子而傳孫五百歲期間或治

而或亂簡策俱在滅否焉逃時運已窮
於前朝曆數竟歸於

真主

太祖康獻大王握符興運

稽古彌文

法漢祖收秦圖書

體唐宗購隋典籍

命搜勝國之史以備

秘府之藏逮

三宗之相承

宣重光而致治乃設史局仍掌編摩有全
史既蒐剔而包羅有節要復研劑而簡
切更數紀而告訖為一代之成書

世祖惠莊大王德性在躬

聰明冠古

惟精惟一允協舜哲而堯欽

丕顯丕承聿追文謨而武烈

慨我國雖有舊籍無長編可擬前脩方金
積之欲紬遽鼎湖之云邈恭惟

主上殿下研窮至理

恢廓先猷

巍乎功煥乎章治道於斯為盛

繼之志述之事制作粲然有文通鑑之成

適當今日臣等俱以謏薄之孱質叨奉

撰述之

綸音才既乏於三長辭何有於一贊思欲

上荅於

隆委祇自俯竭其微勞博採羣書裒為臣

帙凡例皆倣於資治大義實法乎春秋

因年代之後先繫時月而序次論其世

考其事雖略加刪潤之勤惡則貶善則

褒恐未合筆削之旨間竊附僭踰之論

說庶發明往昔之是非上下千四百年

前者覆而後者戒彙粹五六十卷義欲

正而辭欲嚴敢塵

高明采增戰懼

置諸左置諸右時

賜乙夜之觀

監有夏監有殷永作千秋之鏡所修東國

通鑑五十七卷謹隨箋以

聞無任激切屏營之至臣居正等誠惶誠恐
稽首謹言

成化二十一年乙巳七月二十六日純
誠明亮佐理功臣崇政大夫達城君兼
弘文館大提學藝文館大提學知經
筵春秋館成均館事臣徐居正等
謹
上箋

東國通鑑卷之一

三國紀

新羅

高句麗

百濟

新羅始祖元年

漢宣帝五年

夏四月丙辰始祖

朴赫居世立先是朝鮮遺民分居東海濱山

谷為六村曰闕川楊山曰突山高矮曰蓄山

玆支曰茂山大樹曰金山加里曰明治山高

耶是為辰韓六部高墟村長蘇伐公望楊山

蒼蘿井林間有馬嘶往見得大郊剖之有嬰

兒養之岐嶷夙成六部異之立為君年十三

獠居西干國獠徐羅伐其以朴為姓者以所
剖之卵似瓠俗謂瓠為朴

權近曰孔子刪詩書斷自唐虞蓋以唐虞
以前世道鴻荒難可盡信也唐虞以降則
中國載籍已無可怪之事矣三國始祖之
生俱與漢並時矣安有若是其可怪者乎
非獨始祖為然閔英之生脫解之出亦皆
怪而不常豈非厥初海隅之地有生之衆
淳朴無知間有一為詭說者舉皆信而神
之以傳後世也不然何其怪異之多乎

新羅始祖

臣等按新羅本史其君稱居西干者一居
西干辰言王或云呼貴人之稱也次次雄
者一次次雄或云慈克方言巫蓋神而敬
畏之稱也尼師今者十六齒理之稱麻立
干者四以其擲表位之稱至二十二世智
證王三年始稱王而定國獠曰新羅自赫
居世至于照知二十一代之間君未嘗稱
王國未有定號崔致遠作年代曆皆稱王
金富軾撰三國史因舊史而直書權近作
史略從致遠年代曆皆以王書之蓋欲變

辰戊

而尊名號也今臣等亦依致遠權近之例
自始祖以下皆稱王而國號以新羅冠之
且赫居世二十一年而高句麗始祖朱蒙
立四十年而百濟始祖溫祚立三國立國
歲月雖差有先後皆當赫居之時鼎足之
勢已成是以名曰三國紀云

五年

漢廿五年

春正月立閼英為妃初龍見於

閼美井右脇生女兒有老嫗異而養之以井
為名及長有德容始祖納為妃有賢行能內
輔時人謂之二聖

權近曰國家之興莫不有內助之羨夏有
塗山商有有嫫周有大妣所以正始而基
化者其至矣哉閼英為始祖之妃國人稱
羨之必其德有以服國人心矣然其至
與始祖並稱為二聖則非矣二聖之稱見
於唐高宗武后之時高宗溺於武后立以
為后武后以巧慧陰鷲干與大政垂簾同
聽斷時人謂之二聖羅代之初民俗淳朴
其稱君尚用方言未應遽稱二聖是必羅
人事唐高宗之後習聞二聖之稱未知其

非慕效而追稱之歟况唐制書稱聖德王
為二明慶祚則羅人入唐不敢稱二聖而
以為二明其自稱於國中則乃爾也
臣等按權近以謂二聖之稱見於唐高宗
武后之時羅人事唐慕效追稱以今考之
漢成帝鴻嘉元年新羅執公聘於馬韓曰
我國自二聖肇興人事修天時和漢平帝
元始四年新羅王南解謂左右曰二聖棄
國孤以不德讓居君位則二聖之稱當時
已有之矣權近之論若是何耶

辛未庚辰

八年

漢甘露四年

倭來寇邊聞王有神德乃還

十七年

漢光武三年

王巡撫六部勸督農桑妃

關英從焉

權近曰省方人君之事也古之人君春省
耕而補不足秋省斂而助不給一遊一豫
無非所以為民也今始祖巡撫六部勸督
農桑庶幾古者省方補助之法矣若婦人
則無外事教令不出於閨門之內而妃從
焉非禮也

十九年

漢末光五年

春正月卜韓以其國來降

壬午

甲甲

漢建昭二年新羅始祖元二十一年 新羅築京城

號曰金城○高勾麗始祖高朱蒙立先是扶餘王解夫妻老無子祭山川求嗣所御馬至鯤淵見大石相對而泣怪之使人轉其石有小兒金色蛙形王喜曰此天賚我令胤養之名曰金蛙及長立為太子後其相阿蘭弗曰夢天帝謂我曰將使吾子孫立國於此汝其避之東海之濱有地曰迦葉原土壤膏腴宜五穀可都也遂勸王移都國彌東扶餘其舊都有人自稱天帝子解慕漱來都焉及解夫

妻憂金蛙嗣得女子於太白山南優渤水問之曰我是河伯之女柳花與諸弟出遊解慕漱誘入熊心山下鴨綠室中私之即往不返父母責我無媒而從入遂謫於此蛙異之幽於室中為日所灼引身避之日影又逐而灼之因有娠生一卵蛙棄之與犬豕不食棄之路牛馬避之棄之野鳥覆翼之蛙欲剖之不能毋裹置暖處有男子破殼而出骨表英奇年甫七歲自作弓矢射之發無不中扶餘俗謂善射為朱蒙故名之蛙有七子其技能皆

不及朱蒙長子帶素言於父曰朱蒙生也非
常且有勇不早圖恐有後患蛙不聽掌喂馬
朱蒙增損其芻豆令駿者瘦而駑者肥蛙自
垂肥而與朱蒙瘦獵于野與朱蒙矢小而殪
必多蛙諸子忌欲殺之母語朱蒙曰國人將
害汝以汝才略何往不可孰與遲留而後悔
者乎朱蒙乃與烏伊摩離陝父等三人行至
淹澆水無梁祝曰我是天帝子河伯外甥今
日逃難追者垂及奈何於是魚鼈成橋朱蒙
得渡橋乃解追騎不及朱蒙行至毛屯谷遇

麻衣納衣水藻衣三人麻衣曰再思納衣曰
武骨水藻衣曰默居朱蒙賜再思姓克氏武
骨仲室氏默居少室氏語衆曰我方承景命
遇此三賢豈非天乎俱至率本扶餘沸流水
上都焉國號高句麗因姓高四方聞之來附
者衆其地連靺鞨朱蒙恐見侵盜遂攘斥之
靺鞨畏服不敢犯朱蒙見沸流水菜葉流下
知有人居上流往尋之果有國曰沸流其王
松讓見朱蒙曰寡人僻在海隅未嘗得見君
子吾子何從而來曰我是天帝子來都率本

酉乙

松讓曰我累世為王君立都日淺地小不足容兩主君為附庸可乎朱蒙忿之因與較藝松讓不能抗

亥丁

漢建昭五年新羅始祖二年夏六月松讓以國降于高勾麗封為多勿侯麗語謂復舊土為多勿

丑巳

城郭宮室
漢成帝建始元年新羅始祖六年春正月新羅營宮室於金城○冬十月高勾麗王命烏伊扶

巳癸

芬奴伐狩人國取之國在太白山東南
漢河平元年新羅始祖十年夏樂浪人侵新羅見邊人夜戶不扃露積被野相謂曰民不相盜可謂有道之國吾儕潛師襲之無異於盜得不愧乎乃引退

午甲

麗遣扶尉馱滅北沃沮沃沮一名置溝婁其地北接挹婁挹婁在不咸山北東濱大海其地多山險人多勇力土氣寒冬常居穴其弓長四尺力如弩矢用楛長八寸青石為鏃古

百丁

之肅慎氏之國也自漢以來臣屬扶餘責其租賦然俗喜乘船善寇鈔沃沮畏之每夏截巖穴至冬船道不通乃下居焉至是滅之

漢陽朔元年新羅始祖十四年秋八月高勾麗

王毋柳花卒於東扶餘扶餘王金蛙以太后禮葬之立神廟冬十月高勾麗遣使致方物

以謝

丑辛

屬國比年不輸職貢事大之禮其若是乎對

漢鴻嘉元年新羅始祖十八年春二月新羅遣

寅壬

曰我國自二聖肇興人事修天時和倉庾充實人民敬讓辰韓卞韓樂浪倭人無不畏懷而吾王謙虛遣下臣修聘可謂過於禮矣而大王又怒劫之以兵何耶馬韓王愈怒欲殺之左右諫止乃聽還先是中國之人苦秦亂東來馬韓者頗多與辰韓雜居至是寢盛故馬韓忌之瓠公本倭人初以瓠渡海而來故號焉

漢鴻嘉二年新羅始祖三十九年春馬韓王高勾麗始祖十九年琉璃玉元年卒或說新羅王曰西韓王前辱我使今當其

喪征之其國不足平也王曰幸人之災不仁也遣使吊慰

臣等按古之為師不伐喪伐喪不仁也昔滕昭公卒之三月宋圍滕春秋貶而稱人晉士匄帥師侵齊至穀聞齊侯卒乃還春秋備書褒之今始祖棄前日之憤矜隣國之恤非惟不伐遣使吊之所謂怨不棄義怒不廢禮其用心可謂寬且仁矣大抵創業之主子孫之所當法也後嗣之忠厚相傳維持千百年之久者豈非今日貽謀之

善耶

夏四月高句麗王立子類利為太子初王在扶餘娶禮氏有娠王既去乃生類利有奇節喜彈丸嘗出遊彈雀誤中汲婦盆婦罵曰此兒無父其頑如此類利慙復以泥丸彈塞之歸問其母曰我父何人今何在母戲曰汝無父類利泣曰人無父何面目立於世欲自刎母止之曰前言戲耳汝父非常人不容於國奔南地開國類利曰父為君子為匹夫寧不愧乎母曰汝父方行語妾曰有遺物哉

在七嶺七谷石上松下得此者乃吾見也類
利往山谷通索不得一日聞柱礎間若有聲
就見礎石有七稜自解曰七嶺七谷者七稜
也石上松者柱也乃搜柱下得斷劍一段與
屋智勾鄒都祖三人行至卒本見王以劍進
王出所藏斷劍合之果驗乃悅立以為嗣○
秋九月高勾麗王朱蒙薨太子類利立葬始
祖于龍山號東明聖王

漢鴻嘉三年新羅始祖祖四十年高勾麗春百
琉璃王二年百濟始祖祖温祚王九年
濟始祖高温祚立初朱蒙逃難至卒本扶餘

其王無子只有三女見朱蒙非常人以第二
女妻之未幾王薨朱蒙嗣生二子長曰沸流
次曰温祚及類利為太子二人恐為太子不
容遂與烏干馬黎等十人南行至漢山登負
兒嶽望可居之地沸流欲居海濱十臣諫曰
惟此河南之地北帶漢水東據高岳南望沃
澤西阻大海宜定都於此沸流不聽分其民
歸彌鄒忽居之温祚都河南慰禮城以十臣
為輔國號十濟沸流以彌鄒土濕水鹹不得
安居來見慰禮都邑既定人民安泰慙毒死

其臣民皆歸於慰禮改國號曰百濟系與高
句麗同出扶餘故以扶餘為氏

臣等按麗濟立國皆後於赫居世赫居世
尚未稱王朱蒙見忌於金蛙諸子逃難奔
竄間關跋涉來居率本川温祚不見容於
宗國流離播遷來居慰禮城是皆艱難草
創僅能自保其稱王未可知也金富軾作
三國史於赫居世本紀稱居西干於朱蒙
温祚皆稱王是固可疑至如解夫妻之於
扶餘松讓之於沸流馬韓黃龍等國有同

蠻觸安得而為國安得而稱王富軾皆稱
以王亦復可疑况三韓鼎峙之時馮韓統
五十四國天下韓各統十二國散如碁局
以區區東韓之地而餘八十國豈盡稱王
乎竊觀富軾修史之例新羅之君則代各
異號而仍舊史書之他國則本無他號書
主不可書王不可又不可夷狄之而無名
號故筆之於史不得其說而乃書曰王何
以知其然耶富軾於新羅本紀居西干次
次雄尼師今麻立于皆以實書之至如君

辰下

舉必書則嘗從本彌矣而每書曰王與其
實不同此亦修史立文不得已而然耳
夏五月百濟立東明王廟○秋七月高勾麗
王納多勿侯松讓女為妃

權近曰按昔魯文公娶在三年之外春秋

猶譏其喪未畢而圖婚况在期年之內而

納妃乎類利之罪不待貶絕而自明矣

漢鴻嘉四年新羅始祖四十二年高春正月

勾麗琉璃王三年百濟始祖二年百濟王謂羣臣曰韎鞞連我北境其人勇而

多詐宜繕兵積穀為拒守之計三月以族父

乙音有智識膽力拜為右輔委以兵事韎鞞

古蕭慎氏也國在不咸山北與北沃沮相接

臣等按韎鞞之地最北高勾麗紀有曰卒

本地連韎鞞然新羅百濟常有韎鞞之患

豈韎鞞能越高勾麗而侵二國乎百濟紀

曰國家東有樂浪北有韎鞞其亡也地為

新羅渤海韎鞞所分新羅紀亦曰韎鞞地

連阿瑟羅州是知別有一種介於沃沮

濊貊之間乎抑船道越海而侵二國乎未

可詳也

巳乙

午丙

戌庚

冬十月高勾麗王妃松氏薨王更嫫二姬曰
 禾姬鶻川人曰雉姬漢人二姬爭寵王造東
 西二宮置之後王出田七日不返二姬相妬
 禾姬罵雉姬曰漢家婢何無禮之甚雉姬慙
 恨亡歸王親自追之雉姬怒不肯還
 漢末始元四年新羅始祖四十二年高
 勾麗留璃王四年百濟始祖三年高
 秋九月
 生還者十一二
 百濟遣使樂浪修好

漢元延二年新羅始祖四十七年高
 勾麗瑠璃王九年百濟始祖八年高
 春二月
 蘇鞞圍百濟慰禮城王閉城門不出經旬賊
 糧盡而歸王簡鏡卒追及大斧峴戰克之○
 秋七月百濟築馬首城豎瓶山柵樂浪太守
 使告曰頃者聘問結好義同一家今逼我疆
 造立城柵或者其有蠶食之謀乎若不渝舊
 好隳城破柵則無所猜疑不然請一戰決勝
 負王曰設險守國古今常道豈敢以此渝好
 若執事恃強出師小國亦有以待之遂與樂
 浪失和

子壬

漢元延四年新羅始祖四十九年高夏四月
勾麗瑠璃王十一年百濟始祖十年
高勾麗王謂羣臣曰鮮卑恃險不我和親利
則出抄不利則入守為我國患能制者重賞
之扶芬奴曰鮮卑險固之國人勇而愚難以
力闖易以謀屈宜使人反間給以國小兵弱
鮮卑易我必不為備臣俟其隙率精兵從間
道王使羸兵軍城南佯敗走彼必空城追之
臣以精兵入其城王親率勇騎挾擊之可克
王從之鮮卑果開門出兵追之扶芬奴走入
城鮮卑驚奔扶芬奴當關拒戰斬殺甚多王

丑癸

舉旗鳴鼓而前鮮卑首尾受敵計窮力屈降
遂為屬國王賞扶芬奴食邑肆曰此王之德
臣何功焉不受王乃賜黃金三十斤良馬一
十匹○冬十月靺鞨寇百濟北境王遣兵二
百拒戰於昆彌川敗績依青木山自保王親
率精騎出烽峴救之賊退
漢綏和元年新羅始祖五十年高勾夏四月
麗瑠璃王十二年百濟始祖十一年
樂浪以靺鞨襲破百濟瓶山柵殺掠一百餘
人○秋七月百濟設禿山狗川兩柵以塞樂
浪之路

卯乙

漢哀帝建平元年新羅始祖五十二年高春
勾麗瑠璃王十四年百濟始祖十三年
正月扶餘王帶素遣使聘高勾麗請交質子
王憚扶餘強大欲以太子都切為質都切不
肯行帶素恚之○二月百濟王都有老嫗化
為男五虎入王城○夏五月百濟王母薨王
謂羣臣曰國家東有樂浪北有靺鞨侵軼疆
境少有寧日况今妖祥屢見國母棄養勢不
自安予觀漢水之南土壤膏腴將遷都以圖
久安秋七月命立柵于漢山下移慰禮民戶
實之八月遣使馬韓告遷都定疆域北至涓

辰丙

河南限熊川西窮大海東極走壤九月乃立
城闕○冬十月扶餘王以兵五萬侵高勾麗
會大雪士卒多凍死乃引去
漢建平二年新羅始祖五十二年高勾春正
麗瑠璃王十五年百濟始祖十四年
月百濟徙都漢山二月王巡撫部落勸農○
秋七月百濟築城漢江西北分漢城民○東
沃沮遣使新羅獻良馬二十匹曰寡君聞南
韓有聖人出遣使來獻沃沮在高勾麗蓋馬
山之東東濱大海北與挹婁扶餘南與濊貊
相接其地東西狹南北長可千里邑落各有

帥長土地肥美背山向海宜五穀善田種人
性質直強勇漢武帝滅朝鮮以其地為玄菟
郡

漢建平三年新羅始祖五十四年高勾春正
麗瑠璃王十六年百濟始祖十五年

月百濟作新宮

漢元壽元年新羅始祖五十六年高勾春樂
麗瑠璃王十八年百濟始祖十七年

浪侵百濟慰禮城○夏四月百濟立國母廟

權近曰有國家者必立宗廟以祀其先禮
也國母自當配食於禰不宜別立廟而祀
之也魯隱公別為仲子立廟春秋譏之今

新羅始祖
高勾麗瑠璃王
百濟始祖

百濟既立東明之廟而為國母別立其廟
何哉借曰禮無二嫡而類利之母既配東
明故溫祚不得不為其母別立廟而祀之
則東明之廟在高勾麗百濟以高勾麗為
宗國不得別祀東明當如夔子之不祀祝
融與鬻熊也若自別為宗以立東明之廟
則不當配以他國之母而別祀其母也溫
祚於此胥失之矣

漢元壽二年新羅始祖五十七年高勾秋八
麗瑠璃王十九年百濟始祖十八年
月高勾麗郊豕逸王使託利斯卑追之至長

東監一

屋澤中得之斷其脚筋王怒曰祭天之牲豈可傷也遂坑殺二人九月王疾巫曰訖利斯卑為崇王使謝之即愈

權近曰祭天於郊天子之禮也高句麗以蕞爾下國僭行其禮天豈受之哉祭帝之牲養之必有其所掌之必有其人郊豕之逸至于再三天示不受之意明矣夫天者理之所在而神不歆非禮麗王不知循理而無違率禮而不越小心翼翼畏威保民實所以事天也乃敢非義犯分僭天子之

新羅南解王 高句麗留璃王 百濟始祖

禮既以失矣又以一豕之故遂殺二人以是事天及所以欺天也其得疾病豈必二人之崇哉

冬十月靺鞨侵百濟王帥兵逆戰於七重河虜酋長素牟送馬韓坑其餘衆○十一月百濟王欲襲樂浪牛頭山城至白谷遇大雪乃

還

漢平帝元始二年新羅始祖五十九年高句麗留璃王二十一年百濟始祖二十年春

二月百濟王設大壇親祀天地自是每歲四仲王祭天及五帝○三月高句麗郊豕逸王

戊壬

亥癸

命掌牲薛支追之至國內尉那巖得之還見
王曰臣至尉那巖見其山水深險地宜五穀
又多麋鹿魚鼈王若移都不唯民利無窮可
免兵革之患王然之○秋九月高勾麗王如
國內審地形

漢元始三年新羅始祖六十年高勾麗
溜璃王二十二年百濟始祖二十一年冬十

月高勾麗王徙都國內築尉那巖城十二月
王田于質山五日不返大輔陝父諫曰王新
移都邑民不按堵宜德政是恤而馳騁田獵
久而不返若不改過臣恐政荒民散先王之

新羅南解王 高勾麗溜璃王 百濟始祖

子甲

業墜地王怒罷陝父職陝父出奔南韓

漢元始四年新羅始祖六十一年南解王元
年高勾麗溜璃王二十三年百濟始祖二十

二年春二月高勾麗王立子解明為太子大赦

○三月新羅王赫居世薨越七日王妃閼英

薨太子南解立彌次次雄稱元

金富軾曰人君即位踰年稱元其法詳於

春秋此先王不刊之典也伊訓曰成湯既

歿太甲元年正義曰成湯既歿其歲即太

甲元年然孟子曰湯崩大丁未立外丙二

年仲壬四年則疑若尚書之脫簡而正義

之誤說也或曰古者人君即位或踰月稱元年或踰年而稱元年踰月而稱元年者成湯既歿太甲元年是也孟子云大丁未立者謂大丁未立而死也外丙二年仲壬四年者皆謂大丁之子太甲二兄或生二年或生四年而死太甲所以得繼湯耳史記便謂此仲壬外丙為二君誤也由前則以先君終年即位稱元非是由後則可謂得商人之禮者矣

擢近曰按三國古史皆以先王薨葬為嗣

新羅南解王

高句麗瑠璃王

百濟始王

王元年高麗臣金富軾撰三國史因而不革然其論曰人君即位踰年稱元此先王不刊之典也以先君終年即位而稱元非是矣今斷以君薨明年為嗣王元年底不失春秋一年不兩君之義也

臣等按國君嗣世踰年改元乃禮之正若改元於薨年則是一年之內國有二君也漢儒惑於書序之文乃以湯崩踰月為太甲元年蘇氏以為崩年改元亂世事也胡氏蔡氏亦辨之已詳富軾又以漢儒之說

為是何邪權近史略改舊史踰年稱元庶
幾得春秋之義然三國史上下一千載間
編年紀事例以薨年為元今若捨舊史從
史略則其紀事頗有抵牾失實也故因舊
史而書之

新羅葬始祖于蛇陵○秋七月樂浪兵圍新
羅金城王謂左右曰二聖棄國孤以否德謬
居君位今隣國來侵奈何左右曰賊幸我有
喪敢以兵來天必不祐賊果退○九月百濟
王帥騎一千獵斧峴東猝遇靺鞨一戰破之

新羅南解王 高句麗留南王 百濟始祖

虜獲生口分賜將士

寅丙

漢王莽居攝元年新羅南解王三年高句麗
王增瑞王二十五年百濟始祖二十四年春

正月新羅立始祖廟○秋七月百濟立熊川

柵馬韓王遣使責曰王初渡河無所容足吾

割東北百里之地界之其待王不為不厚宜

思有以報之今以國完民聚謂我莫與敵大

設城池侵犯我封疆如義何王慙遂壞之

卯丁

漢王莽居攝二十六年新羅南解王四年高句麗
王增瑞王二十六年百濟始祖二十五年春

二月百濟王宮井水暴溢漢城人家馬生牛

一首二身日者曰井溢者大王勃興之兆牛

一首二身者大王并隣國之應也王喜遂有并吞辰馬之心

辰戈

漢王莽初始元七年新羅南解王五年高句春麗瑠璃王二十七年百濟始祖二十六年

正月新羅王以長女妻昔脫解脫解本多婆那國人國在倭國東北一千里初其國王娶女國王女為妻有娠七年生大卵王以不祥棄之女裹以帛并寶物置積中浮海任听之初至金官國海濱人怪之不取轉至辰韓阿弥浦口有老嫗繩之開積有兒存遂養之及壯身長九尺風神秀朗智識過人以積始來

新羅南解王 高句麗瑠璃王 百濟始祖

有鵲隨鳴省鵲以昔為氏以解積而出名脫解業漁釣養嫗無怠色嫗曰子骨相殊異非常人宜力學立功名脫解遂精專學問兼通地理望揚山下甄公宅為吉地以計取而居之南解王聞其賢以其女妻之○三月高句麗太子解明如黃龍國而還初王遷都解明不肯徙留在古都有力好勇黃龍國王遣使贈強弓解明對其使驚折之曰非子有力弓自不勁耳黃龍王慙麗王聞之怒使告黃龍王曰解明為子不孝請為寡人誅之至是黃

龍王遣使請太子相見太子欲行有諫者曰
今隣國無故請見意不可測太子曰天之不
欲殺我黃龍王其如我何遂行黃龍王見之
不敢加害禮送之○秋七月百濟王謂諸將
曰馬韓漸弱上下離心勢不能久儻為他有
唇亡齒寒悔不可及不如先人取之冬十月
陽出獵潛師襲之遂并其國唯圓山錦峴二
城固守不下

巳巳

新羅南解王高句麗瑠璃王百濟始祖
三月高句麗王遣人謂解明曰吾遷都欲安

民汝不我随恃強力結怨鄰國於子道何乃
賜劔自裁太子欲自殺或止之曰大王長子
已卒太子當為後今使者一至而自殺安知
非詐乎太子曰嚮黃龍王以強弓遺之我怒
其輕我國折之不意見責於父王今父王以
我為不孝賜劔自裁父命可逃乎乃往礪津
東原以槍挿地走馬觸槍而死年二十一以
太子禮葬於東原

金富軾曰孝子之事親也當不離左右以
致孝若文王之為世子解明在於別都以

好勇聞其得罪也宜矣傳曰愛子教之以
義方不納於邪今王始未嘗教之及其惡
成疾之已甚殺之而後已可謂父不父子
不子矣

夏四月馬韓圓山錦峴二城降于百濟移其
民於漢山馬韓亡

周武王已卯討殷太師箕子于朝
鮮都平壤相繼歷九百餘年至四十四代孫
否當始皇二十六年庚辰畏秦服屬焉否
死子準立後二十九年漢惠戊申燕人衛

新羅南解王 高句麗留高王 百濟始祖

滿亡命聚黨攻之準浮海而南至金馬郡
都之稱馬韓統五十餘國歷四郡二府之
時傳世亦二百年至是為百濟所滅箕氏
相傳通前後蓋千有餘年夫其傳世之久
至於如此夫豈無自而然哉蓋我箕子以
明疇之學高不臣之志歛而東歸敷八條
之教行井田之制其深仁厚澤足以固結
民心而壽國脉於綿遠者矣吾東方禮俗
之美聞於天下夫子有欲居之志漢史稱
仁賢之化唐書美君子之國宋朝以為禮

樂文物之邦涵虛子亦曰詩書仁義之國也則吾箕子過化存神之妙惠我東邦者歷千萬祀而如一日也惜其載籍無傳文獻不徵也今馬韓之滅金富軾權近皆不言箕君終始何耶以箕子之聖之德子孫微弱播遷一朝不祀忽諸不亦悲乎

秋八月扶餘王帶素遣使讓高句麗王曰我先王與先君東明相好而乃誘我臣僚逃至于南以立國夫國有大小人有長幼以小事大禮也以幼事長順也今王能禮順事我天

新羅南解王 高句麗王 百濟始祖

必祛之不然欲保社稷難矣王自以立國日淺民孱兵弱示屈以圖後效報曰寡人僻在海隅未聞禮義今奉命敢不唯教時王子無恤尚幼聞王失對自見扶餘使者曰我先祖生而神異賢且多才大王讒諸父王辱先祖以牧馬先祖見幾而出今大王不念前愆但恃兵強輕蔑我邦請使者歸報大王今有累卵於此若大王不毀其卵則吾將事之不然則否帶素聞之徧問羣下莫有對者有老嫗對曰累卵者危也不毀者安也其意若曰王

不知自危而欲人之事已不如易危以安而自理也

午庚

始建國二年新羅南解王七年高句麗春二月百濟立元子多婁為太子○秋七月新羅

以脫解為大輔委以軍國政事

壬壬

始建國四年新羅南解王九年高句麗王莽

殺高句麗兵伐胡高句麗不欲行強迫遣之皆亡出塞因侵遼西太伊田譚追擊之為所殺莽怒討之嚴尤奏言麗人犯法宜令州郡慰安之今彼以大罪恐其違叛扶餘之屬必

有和之者且匈奴未克扶餘歲貳復起此大

憂也莽不聽詔尤擊之尤誘高句麗將侯雛

斬之傳首京師莽悅降封高句麗王為下句

麗王布告天下於是侵漢邊地愈甚

百庚

始建國五年新羅南解王十年高句麗冬十一月扶餘侵高句麗王使子無恤帥師禦之

無恤以兵少恐不能敵設奇伏于山谷待之

扶餘兵直至鶴盤嶺下伏蔽擊其不意扶餘

軍大敗棄馬登山無恤縱兵盡殺之

天鳳元年新羅南解王十一年高句麗春正

戊甲

始建國三年百濟始祖三十二年春正

戊子 丙子

月高勾麗王立子無恤為太子○秋八月高
勾麗王遣烏伊摩離領兵二萬西伐梁貊滅
之○倭侵新羅邊郡新羅廢六部勁兵千人
以禦之樂浪乘虛攻金城急夜有流星墜於
賊營賊懼而退屯關井上造石堆二十而去
六部兵追者至關川見石堆知賊衆乃止
天鳳三年新羅南解王十三年高勾麗冬十
留瑞王三十五年百濟始祖三十四年冬十
月馬韓舊將周勤起兵據百濟牛谷城王帥
兵五千討之周勤自經腰斬其尸并殺妻子
天鳳五年新羅南解王十五年高勾麗瑞高
三三十七年大武神王元年百濟始祖三十

辰庚 卯己

六夏高勾麗王屬七國投○冬十月高
勾麗王類利薨琉璃明王太子無恤立
天鳳六年新羅南解王十六年高勾麗
大武神王二年百濟始祖三十七年夏四
月百濟旱至六月乃雨漢水東北部落饑亡
入高勾麗者千餘戶涇帶之間空無居民
地皇元年新羅南解王十七年高勾麗
大武神王三年百濟始祖三十八年春二
月百濟王巡撫境內東至走壤北至涇河五
旬而返又蒞使勸農桑除不急擾民之事○
三月高勾麗立東明王廟○冬十月扶餘王
帶素遣使高勾麗送赤鳥一頭二身初扶餘

壬

人得烏獻王或曰烏木黑變而赤又一頭二
身并二國之徽王其燕高句麗乎帶素喜送
之燕示或者之言王報曰黑者北方之色今
變為南方之色又赤烏瑞物也君得而不有
送於我兩國存亡未可知也帶素悔之○百
濟王築大壇祀天地

地皇三年新羅南群王十九年高句麗大武神王五年百濟始祖四十年
高句麗王攻殺扶餘王帶素先是麗王帥師
抵利勿林夜聞金鑿得金璽兵器等物曰
天賜也拜受之道遇一人身長九尺面白而

新羅南群王高句麗大武神王百濟始祖

自有光拜王曰臣是北溟人怪由竊聞大王
北伐扶餘臣請從行取扶餘王頭王悅許之
至是進軍於扶餘國南其地多泥淖王使擇
平地為營解鞍休卒扶餘王自率眾出戰欲
掩其不備策馬以前陷泥淖不能進退麗王
揮怪由進怪由拔劍彌吼擊之敵皆披靡不
能支怪由直進斬扶餘王頭扶餘人猶不屈
圍麗兵數萬麗王以糧盡士饑不知所為忽
大霧咫尺不辨人物七日王令作偶人執兵
器列營內外為疑兵從間道潛軍夜出既還

東監

二十一

乃會羣臣飲至曰孤以不德輕伐扶餘雖殺其王未滅其國而又多失我軍資此孤之過也遂親吊死問疾以存慰百姓國人感悅○夏四月扶餘王帶素之弟自立為王王金蛙季子史失其名至是立都於曷思水濱秋七月帶素從弟謂國人曰我先王身亡國滅民無所依王弟不念圖存逃竄出外都於曷思吾亦不肖無以興復乃與萬餘人投高勾麗王封為王置椽那部以其背有絡文賜姓絡氏○冬十月高勾麗將怪由卒怪由疾革王

新羅儒禮王高勾麗大武神王百濟始祖

未癸

親臨存問怪由言臣北溟微賤之人猥蒙厚恩雖死猶生不敢忘報尋卒王念前功命有司葬北溟山陽以時祀之○韎韞襲百濟斧峴城殺掠百餘人王命勁騎二百拒擊之

愆

漢更始二年新羅南解王二十一年儒理王元年高勾麗大武神王七年百濟始祖四十二年秋新羅王南解薨太子儒理立南解將薨

申甲

東

二

乙酉

謂儒理及婿皆脫解曰吾死後爾朴皆二姓以年長嗣位焉及薨儒理以脫解有德望讓之脫解曰神器非庸人所堪吾聞聖智人多齒試以餅啗之儒理齒理多乃立之彌尼師今

漢光武建武元年新羅儒理王十二年高勾麗大武神王八年百濟始祖四十二年高勾麗

九月百濟鴻鴈羣集王宮日者曰鴻鴈民之象也將有遠人來投者乎冬十月南沃沮仇頗解等二十餘家至斧壤納款王置之漢山西

新羅儒理王高勾麗大武神王百濟多婁王

丙戌

冬十月高勾麗王伐蓋馬國殺其王以其地為郡縣十二月勾茶國王聞蓋馬滅懼舉國來降高勾麗之地浸廣

丁亥

漢建武三年新羅儒理王四年高勾麗大武神王十年百濟始祖四十五年春正月高勾麗以乙豆智為左輔松屋勾為右輔

戊子

春二月百濟始祖溫祚薨太子多婁立○秋七月漢遼東太守將兵伐高勾麗王會羣臣問戰守之計右輔松屋勾曰臣聞恃德者

昌恃力者亡今中國荒儉盜賊蜂起而兵出無名此必邊將規利擅侵吾邦逆天違人師必無功憑險出奇破之必矣左輔乙豆智曰小敵之強大敵之禽也臣度大王之兵孰與漢兵之多可以謀伐不可力勝王曰謀伐若何對曰今漢兵遠聞其鋒不可當大王閉城自固待其師老出而擊之可也王然之入尉那巖城固守數旬漢兵圍不解王以力盡兵疲謂豆智曰勢不能守為之奈何豆智曰漢軍謂我城為巖石必無水泉久圍待疲宜取

新羅儒理王高句麗大武神王百濟多婁

池魚包水草蕪以酒致犒王從之貽書曰寡人愚昧獲罪上國致令將軍帥百萬之軍暴露弊境無以荅厚意敢用薄物致供於左右於是漢將謂城內有水不可猝拔乃報曰皇帝不以臣驚下令出師問罪及境喻旬未得要領今聞來旨言順且恭敢不以此歸報遂引還○冬十一月新羅王巡國內見一老嫗凍餒將死王曰予以眇躬居上不能養民使老幼至於此極賜衣及食仍命有司存問鰥寡孤獨老病不能自活者賑給之隣國百姓

聞而來者衆

庚寅

漢建武六年新羅儒理王七年高勾麗冬十
大武神王十三年百濟多婁王三年

月百濟東部屹于與靺鞨戰於馬首山西克

之殺獲甚衆王喜賞屹于馬十匹租五百石

辛卯

漢建武七年新羅儒理王八年高勾麗
大武神王十四年百濟多婁王四年秋八

月百濟高木城昆優與靺鞨戰大克之斬首

二百餘級

壬辰

漢建武八年新羅儒理王九年高勾麗
大武神王十五年百濟多婁王五年春新

羅改六部之名仍賜姓以楊山部為梁姓李

高墟部為沙梁姓崔大樹部為漸梁姓孫子

新羅儒理王高勾麗大武神王百濟多婁王

玃部為本彼姓鄭加利部為漢祗姓裴明活

部為習比姓薛王既定六部中分為二使王

女二人各率部內女子自秋七月既望每日

早集大部之庭續麻夜分而罷至八月十五

日考其功之多小負者置酒食以謝勝者相

與歌舞百戲皆作謂之嘉俳○新羅設官有

十七等一曰伊伐食二曰伊尺食三曰迎食

四曰波玃食五曰大阿食皆授真骨真骨王

族也六曰阿食自重阿食至四重阿食七曰

一吉食八曰沙食九曰烈伐食十曰大柰麻

自重大柰麻至九重大柰麻十一曰柰麻自
重柰麻至七重柰麻十二曰大舍十三曰舍
知十四曰吉士十五曰大烏十六曰小烏十
七曰造位○三月高勾麗以南部使者鄒敦
素為沸流部長初仇都逸荀焚永三人為沸
流部長性貪鄙奪人妻妾財貨恣其所欲有
不與者鞭之人懷忿怨王以始祖舊臣不忍
致法只令廢為庶人以敦素代之敦素作大
室以自處以仇都等罪人不令升堂三人詣
敦素謝曰吾儕小人犯王法不勝愧悔公能

新羅儒理王高勾麗大武神王百濟多婁王

赦過使得自新則死無恨矣敦素引與之坐
曰人孰無過過而能改則善莫大焉乃許為
友仇都等感愧不復為惡王聞之曰敦素不
用威嚴能以智懲惡可謂賢矣賜姓曰大室
氏○夏四月高勾麗襲樂浪降之先是王子
好童遊於沃沮樂浪主崔理適見之謂好童
曰相君之貌必非常人遂同歸妻以女樂浪
有鼓角若有敵兵則自鳴好童將還潛謂女
曰若能入武庫割破鼓角則我以禮迎之女
潛入武庫割鼓面角口以報好童好童歸勸

王襲樂浪崔理以鼓角不鳴不設備麗兵奄
至城下乃知鼓角皆破遂殺女出降○冬十
一月高句麗王子好童自殺初王納曷思王
孫女為妃生好童容貌美好王奇愛之故名
好童元妃恐奪嫡讒於王曰好童欲無禮於
妾王曰善以他產而疾之乎妃見王不信恐
取禍更泣告曰請大王密察之妾若不實妾
當伏罪於是王不能不疑將罪之或謂好童
曰何不自釋乎好童曰我若釋之是顯母之
惡貽父之憂可謂孝乎遂伏劍死

新羅儒理王高句麗大武神王百濟多婁王

金富軾曰今王信讒言殺無辜之愛子其
不仁不足道矣而好童不得無罪何則子
之見責於其父也宜若舜之於瞽叟小杖
則受大杖則走期不陷父於不義好童不
知出此兩死非其所可謂執於小謹而昧
於大義其公子申生之譬耶

十二月高句麗王立子解憂為太子遣使朝
漢帝復其王號

東國通鑑卷之一

